

Filimon Nægkiariien sə rani mə nəfe i nəkukuə

Filimon in iəmə asori riti səvəi nakalasia me fwe Kolosi. In riti nəha Pol. Onesimas, in slef riti səvəi Filimon. In rakres mane səvəi Filimon nənə map mevən fwe Rom. Nəpɪn in ramarə fwe Rom, in rətoni Pol, mɪni nɪpərhiɛniɛn ia nəgkiariien səvəi Iesu Kristo. Pol rərhi pen Onesimas ruvehi nəkukuə i mevən muvei pen m Filimon. Pol rəres skai m Filimon mə trəpwəh nərpwɪniɛn noien ərəha səvəi Onesimas nənə mo in rəmwhɛn ia piəvni. Nəkukuə i rukwakwa. Filimon, Efesas, Kolosi, mɪne Filipae kani mə nəkukuə me səvəi kalapus ti nəri nə mə Pol ramarə ia kalapus fwe Rom ia nuk 59-61 mɪrai nəkukuə me i.

¹ Iou Pol iakamarə ia kalapus ti nəghi Iesu Kristo. Kimrau piəvtaha Timoti iarouni ramasan tukw ik Filimon. Ik iərmama i kitahar mik samaro pəri wok. Kimrau iarouokeikei ik.

² Nənə iarouni mwi ramasan ti kitirimətaha Apia, mɪne piəvtaha Akipas, iəmə sə kitaha min səmwhɛn ia naruagən me. Iarouni ramasan ti nakalasia me pam nəha səməme kamhousəsimwɪn irəha me ia nəkwai nimwə səim.

³ Iarouəfwaki mə Kumwesən tata səkitaha mɪne Iesu Kristo Iərimənu səkitaha trouəriari pehe namasaniɛn mɪne nəmərɪnuɪɛn pwəh irau krauarə tukumiaha.

Pol raməkwein amasan ia Filimon

⁴ Filimon. Ia nəp̄in me, nəp̄in rerik ramrhi ik ia nəfwakiien me səiou, iakani vivi Kumwesən,

⁵ ti nəri nə mə iakamregi kamini nokeikeiien səim sə ikamo m nərmama me pam səvənhi mine nahatətəien səim ikauvehi ia Iesu Iərimənu səkitaha.

⁶ Iakamregi mwi mə ikaməriari ia rerim pam ti nəri nə mə ikamahatətə. Iakəfwaki mə noien nəha trasitu ia niram mo ikukurən amasan mwi narimnari amasan me pam kauvei pehe saməuvehi rauku pen ti Kristo.

⁷ Piak, iakaməfwaki iam̄inhi irə ti nəri nə mə nokeikeiien səim ro nərmama me səvəi Kumwesən rerinraha ragien. Nənə nəp̄in iakregi, iou mwi rerik ragien. Ruvehi utə mwi nətərigien səiou.

Nəresien səvəi Pol

⁸ Filimon, iakuə takəres nari riti mik. Iakukurən n̄iniien nəkwak tukw ik ia nəghi Kristo mə nəfe tikaməkeikei mo,

⁹ mətə nokeikeiien səkrau, ko iapko mhə iam̄inhi. Iakuə takəres a ik. Təkwətəkwuni iou Pol iakinərḡharə, nənə rəmwhen iakuvəni raka iakamarə ia kalapus ti Iesu Kristo,

¹⁰ iakaməres nari riti mik ia n̄ikaren səvəi Onesimas,^a in i səim slef. In ruvehe mətoni iou ia kalapus, nənə iakuvehe məmwhen ia tata səvənhi, in ruvehe nərik.

¹¹ (Fwe kupwən in r̄ipkasitu mhə ia niram, mətə təkwətəkwuni nəha in rukurən nasituien ia krau pəri.)

1:4: Rom 1:8-9 **1:6:** Fil 1:9, Kol 1:9 **1:7:** 2Kor 7:4 **1:9:** Flm 1
1:10: Kol 4:9, 1Kor 4:15 **a 1:10:** N̄ipwrai nəhag nəha Onesimas
in i mə Iəmə sə Ramasitu.

12 Təkwtəkwuni iakamərhi pehe iəmә i, iəmә sә iakokeikei p̄ik, r̄ir̄er̄ig muvehe tukw ik.

13 Iakokeikei mә takəkwətəmhiri əknek̄in ramarə k̄imrau min mә truvehi təmwhek̄im, mamō tukwini nari miou nəp̄in iakamarə ia kalapus ti nəgkiariien amasan.

14 Mətə iapkokeikei mhə mә tako nari riti sә ipkəsēni mhə irə. Tr̄ini minuə ikamo nəri amasan iakokeikei mә truku pen ia rer̄im agien, mətə r̄ipko mhə nəri iakaməkeikei mik tukwe mә tiko.

15 Rosi Onesimas r̄inap məpwəh ik nəp̄in ouihi a mә tikuvehi mwi rouarə rer̄in k̄imirau min.

16 Nənə təkwtəkwuni in r̄ipko mhə slef əpa riti səim, mətə in rəpi raka slef. In piəvtaha keikei riti. Iou iakokeikei p̄ik in, mətə ik tikokeikei p̄ik in rəpi raka ti nəri nə mә in slef səim, mətə irənhə mwi irə in piam, ti nəri nə mә in ruvəuvehe mamahatətə ia Iərimənu sək̄itaha.

17 Ro pen tr̄ini minuə ikamətə iou rəmwhen ia ik riti sә krauo pəri wok, tikuvehi in ia rer̄im pam rəmwhen a mә ikauvehi iou.

18 Tr̄ini minuə r̄ino nari riti rərəha ia niram, uə r̄iməuvehi nari riti m̄ipkuvehi mhə nənimen, tikəmri pen ia kaon səiou.

19 Iou, Pol, iakamrai nəgkiariien i ia rəḡik, iou tapkəraku. (Mətə tikəpwəh nenouenouiien mә səim kaon rarə ti nəri nə mә iou iak̄inasitu ia niram ikuvehi n̄im̄iruuien vi.)

20 Ouəh, piak, iakokeikei mә tikasitu ia nirak, mo rer̄ik ragien, ti nəri nə mә krau pəri krauhatətə ia Kristo Iərimənu sək̄itaha.

²¹ Iakamrai nəkukuə i mik, mukurən amasan mə tiko nəkwa. Iakukurən mə tiko rəpi raka nəfe nəghin iakaməres i.

²² Nənə tikəpnəpenə mwi kwopun riti səiou takapri ikin. Iakani iamīnhi irə ti nəri nə mə iakameitenhi Kumwesən mə trəsəni nəfwakiien me səkimiaha, mo suatuk miou iakrəriḡ pehe tukumiaha.

Nəḡkiariien sampam səvəi Pol

²³ Epafra i iou riti sə kimrau min iarouarə ia kalapus ti nəghi Iesu Kristo in rini ramasan tukw ik.

²⁴ Nənə Mak mine Aristakas, mine Temas, mine Luk iou me nepwīn səməme iahamo pəri wok, irəha mwi hani ramasan tukw ik.

²⁵ Iakəfwaki mə namasanien səvəi Iesu Kristo Iərimənu səkitaha tramarə tukumiaha.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416